

NosAruba 2025 ta enfoca riba futuro di nos Cultura



Logo nobo pa e Comision Cultura, diseña pa Lara Kuiperi y Emmanuel Valdes.



Apertura di e dialogo cu publico di e Comision Cultura den teatro di Musa.



ORANJESTAD - Diasabra dia 4 di juli ultimo, e Comision Cultura di NosAruba 2025 tabatin su prome evento publico den teatro di Musa Art Café den caya principal.

E Comision Cultura ta un di e 12 comisionnan cu ta forma e cuerpo principal di e Plan Nacional NosAruba 2025.

E plan aki ta delinea un manera integral pa yega na un futuro sostenibel, simbolisa pa e aña 2025 como fecha meta pa por tin tur cos na luga.

Eotrocomisionnanta: LifeLong learning, Community Based Initiatives, Socio-economic Structure, Governance, Energy Management, Sustainable Food Supply, Sustainable Tourism, Nation of Innovation, Sports and Nutrition, Environment, and International Finance Centre. Tur comision mester entrega nan report fin di juli 2009. Esun di Comision Cultura yama “Cultura na Caminda pa 2025”

E Chairperson recién eligi, sr. Stan Kuiperi, a presenta e miembronan di e comision nucleo: Sra. Maybelline Arends-Croes (Vice-Chair), Sra. Joyce Pereira, Sra. Wilma Kuiperi-Jansen (Secretary), Sr. Tino Ruiz y Sr. Angelo Tromp.

A splica cu miembronan tin amplio experiencia profesional y estudio relevante pa completa un tarea grandi manera esun di e comision aki. Tras di e grupo nucleo aki tin un grupo di sosten mas amplio, cu na su turno ta bin for di e stakeholdernan, esta varios tereno social manera Educacion, Arte, Medio Ambiente, Asuntonan Social, Gobernacion, etc.

ASPIRATION STATEMENT

Despues di esaki a presenta e Aspiration Statement, un documento tocante e vision di e comision riba un futuro integra, sostenibel, balansa y

dinamico pa Aruba den futuro sercano.

Un version compacto di e Aspiration Statement ta contene e sigiente temanan:

* Na aña 2025, comunidad Arubiano a integra aspectonan social, economico, medio ambiental y gubernamental exitosamente, y a crea un cultura nacional sostenibel cu ta parti di e comunidad global.

* Aruba su cultura cu raisnan multinacional y multi-etnico ta caracteriza su mes pa un co-existencia harmonioso y respet pa e ser humano.

* E ciudadano Arubiano tin un luga central den un comunidad cu ta honra su logronan historico, cu ta conciente di e retonan contemporaneo, y cu ta responsabel pa su futuro.

* Cultura y identidat Arubiano, simbolisa pa nos idioma nacional Papiamentu, ta visibel den tur aspecto di vida y ta forma pa nos educacion, nos manera di pensa, nos nivel

di vida, nos creatividad y nos hospitalidad.

* Habitantenan nobo y bishitantenan ta integra y adapta nos norma y balornan social cu ta acepta generalmente. Educacion y formacion cultural ta fundamental den nos maneho di educacion. Practica di arte den henter comunidad ta expresa e abilidad creativo y innovativo di nos ciudadanonan.

* Nos economia ta diversifica pa medio di un industria creativo y un economia cultural cu ta sostiene turismo, y cu ta stimula produccion, distribucion, consumicion y exportacion di bienes cultural cualitativo.

* E medio ambiente natural ta parti fundamental di e patrimonio cultural di nos isla. E ta proteha y den balansa cu desaroyo infraestructural.

* Pa medio di reconocemento, subsidio, maneho cultural y legislacion, gobierno Arubiano activamente ta

proteha y promove desaroyo cultural segun un codigo di etica cultural.

* Henter comunidad Arubiano ta fuertemente conciente di e importancia di cultura pa desaroyo personal y social, y den bida diario ta activo culturalmente.

Despues, e publico tabatin hopi tempo pa e.o. presenta su propio definicionnan personal di cultura y su puntonan di bista, y tambe pa discuti tocante temanan general y specifico relaciona cu cultura Arubiano. Participantenan a cualifica e encuentro como hopi interesante y educativo, y a aprecia cu por fin nan por a discuti tocante asuntonan cultural urgente den un setting social, democratico y constructivo.

Tur demas stakeholder tambe lo ricibi e informacion aki pa por duna feedback como parti di e proceso di planning y desaroyo nacional pa un cultura Arubiano sostenibel.